



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7 Yangia anidakangma : Tir Yimiyim

tiryimiyim@aolima

tir yimiyim

TAPAK 8

Wagner tekolakba Prigozhin tayimtsü tsükokdak asüba jangjaogo

Prannoy-i World Championships nung bronze medal angu



VOL. XX NO. 316 (ADOK 316)

DIMAPUR TENTONÜ (MONDAY)

LUROI (AUGUST) 28, 2023

₹ 5.00



August 27, 2023 nü Minister of State for Railways and Textiles, GOI, Smt. Darshana Jardosh-i Raj Bhavan, Kohima nung Nagaland Governor La Ganesan den ajurutepdang agiba noksa ka angur. (PRO Raj Bhavan)

NE tesayur 6-i National Teachers' Award 2023 agizüksü

Guwahati, August 27, 2023

(Agencies): Northeast nungi tesayur 6 nem National Teachers' Award 2023 agütsütsü.

Taküm National Teachers' Award atema sorkari school tesayur 50 shimteta lir aser parnok rongnung Northeast nungia tesayur 6 densema lir.

September 5, 2023 nü Vigyan Bhawan, New Delhi nung tesayurtemi sentong ka nung sempettem agizüksü.

Iba sentong nung Tir Droupadi Murmu-i sempet lema agütsütsü.

National Teachers' Award angur shiai kulikaket ka den Rs 50,000 senpet aser silver medal kaka angütsü.

National Teachers' Award angutsüpur tesayurtem ya bendanga agütsüba atema dang masü saka lesson sayutsü atema inyakyim tasen purapiteta amshiba atema shimteta lir.

Northeast nungi iba NTA 2023 angutsüpurtem:

1. Netai Chandra Dey: Ramkrishna Mission School, Tirap district, Arunachal Pradesh.
2. Ningthoujam Binoy Singh: Chingmei Upper Primary School, Bishnupur district, Manipur.
3. Lalthianghlina: Diakkawn High School Kolasib district, Mizoram.
4. Madhav Singh: Alpha English Higher Secondary School, Ri Bhoi district, Meghalaya.
5. Kumud Kalita: Pathsala Senior Secondary School, Muguria, Bajali district, Assam.
6. Dr. Purna Bahadur Chettri: Principal Government Senior Secondary School, Soreng district, Sikkim.

Ita dang Hindu Rashtra ta ajatsüla

New Delhi, August 27, 2023

(Agencies): Tanga tamangba yimsütem aser linüktemi tenüng magidang ita dang "Hindu Rashtra" ta ajatsüla ta All India Hindu Mahasabha National President, Swami Chakrapani Maharaj-i Deobarnü ashi.

"India-i Parliament nung bangzüngtepba ita dang Hindu Rashtra ajatsüla" ta Hindu tanishir Maharaj-i video ka nung ashi.

"Chandrayaan-3 anenzükdak 'Shiv Shakti Point' ta ajaba atema Prime Minister Narendra Modi dang pelar. Ita nung Hindu linük ka amenokba sülen iba tesem ya yimtiba ama renlokdaüksütsüla" ta Maharaj-isa ashi.

"Parliament nungi ita dang

Hindu Sanatan Rashtra ta sangoktsütsüla aser Chandrayaan 3 anenzükdak Shiv Shakti Point ya yimtiba ama renloktsüla. Yamaji asünung dang Jihadi tangatetba alir kiralongrar shingia ibaji metongtettsü" ta paisa metetdaksü.

Tesüiba nunga Hindu tanishir Swami Chakrapani Maharaj-i taoksatsü aketba olentem jembiogo.

2020 küm Covid-19 wara mezüngbuba süidang Swami Chakrapani Maharaj aser par All India Hindu Mahasabha teloki 'gaumutra party' ka ayongzüka agia liasü.

2018 nunga pai Kerala nung nashishi achir tüzümsüng agi kongshirtem nem teyari magütsütsüla ta shia liasü.

PM Modi-i tanü 'appointment letters' 51,000 agütsütsü

Guwahati, August 27, 2023

(Agencies): Prime Minister Narendra Modi-i August 28 nü linük kübok tesem 45 nung Rozgar Mela tibuba lapoktsütsü aser online ajanga o jembitsü.

Rozgar Mela ya Centre sorkari "Mission Recruitment" scheme kübok inyaker aser ita shia lanur lakh aika nem appointment letters agütsür.

Hombarnü agitsü aliba Rozgar Mela nung appointment letters 51,106 tashi lema agütsütsü ta sorkar sangdong ka nung metetdaksüogo.

Guwahati nung agiba sentong nung mendenji Union Minister

asertaba Assam Chief Minister Sarbananda Sonowal alitsü. Iba sentong ya Patgaon nung aliba Border Security Force (BSF) Frontier Headquarters nung agitsü.

Maneni, Cachar district kübok Silchar nung aliba BSF Frontier Headquarters nunga Union Minister of State for Petroleum and Natural Gas, Labour and Employment Rameshwar Teli menden ser sentong ka agitsü.

Guwahati nung appointment letters 287 aser Silchar nung appointment letters 150 tashi agütsütsü renema lir.

Ministry of Home Affairs (MHA)-i Rozgar Mela ajanga Central Armed Police Forces (CAPFs) such as the Central Reserve Police Force (CRPF), BSF, Sashastra Seema Bal (SSB), Assam Rifles, Central Industrial Security Force (CISF), Indo-Tibetan Border Police (ITBP), Narcotics Control Bureau (NCB) aser Delhi Police nung lanurtem shimoker.

Lanurtem ya linük kübok tesem balala nungi shimteter aser parnoki MHA kübok Constable (General Duty), Sub-Inspector (GD) aser Non-GD Cadre Posts inyaksü.

Assam nung tüzümsüng tensa tamajungba kümogo

Guwahati, August 27, 2023

(Agencies): Assam nung Deobarnü tüzümsüng tensa tamajungba kümogo aser district 6 nung nisung 53,000 tema timtemba osang angazüker.

Tzünglu kanga aruba ajanga Brahmaputra ayong aser iba dak yimokba ayongtem nung tzü talila ayimba ajanga tesem aika metsümbangogo.

Tüzümsüng agi kanga mejungi kongshibaji Dhemaji district lir. Iba district nung nisung 24,000 shi timtemer.

Maneni Sonitpur district nung nisung 12,000, Lakhimpur nung 8,500 aser Dibrugarh nung 7,500 timtemba osang lir.

"Assam state nung aliba

ayongtem nung water level 'danger mark' atena tuogo" ta Central Water Commission (CWC)-i ashi.

Jorhat district nung Dhubri aser Neamatighat nung Brahmaputra River, Barpeta district nung Beki River, Sivasagar nung Dikhou River aser Dikhou River nung Sankosh River nung 'danger level mark' atena tzü ayimer, ta CWC-isa metetdaksü.

"Assam nung tüzümsüng agi revenue circles 11 kübok yimsüng 120 metsümbangogo. Tüzümsüng agi kongshia aliba district tem nung ali hectare 3000 nung tsünisenbongsü raksaogo" ta Assam State Disaster Management Authority

(ASDMA)-ia metetdaksü.

ASDMA-i Deobar nikongdang daily flood bulletin metetdaksüba nung tüzümsüng agi district 6 kongshiba shia lir.

Tesüiba ghonda 24 tsüngda tüzümsüng agi kongshiba district temji- Biswanath, Sonitpur, Chiang, Dhubri, Kokrajhar, Dibrugarh, Jorhat, Majuli, Lakhimpur aser Tamulpur lir ta ASDMA-i ashi.

Sonitpur district nung yimsüng 38 tashi tzü agi metsümbangogo aser alu hectare 426.50 mobanga lir, ta parnoki ashi.

Taküm Assam nung tüzümsüng timtem adoker lendong balala nung nisung 14 süogo.

NPF-i Forest Conservation Amendment Act 2023 magizüker

Guwahati, August 27, 2023

(Agencies): Naga People's Front (NPF)-i Forest Conservation Amendment Act, 2023 magizüker ta taoba Chief Minister aser NPF president Dr Shürhozelie Liezietsu-i nenshia shiogo.

Iba Act ajanga Nagaland nung

ali kibur inyakyim nung kongshitsü aser northeast atema majung. Anungji Nagaland Legislative Assembly-i iba Act anema bangzüng ka renemtsüla ta Dr Shürhozelie-i ashi.

Forest Conservation Amendment Act, 2023 ya Nagaland nung benokra khuret

aika ajurutsü. Anungji Naga nungeri iba Act khenyong magizüksüla, ta paisa ayongzük.

Naga nunger atema ali ya kanga dang nüngdak aser asen ali temeten nung kongshiba magizüksü ta Dr Shürhozelie-isa shisem.

NTC-i Kohima DC sangdong ashishir; 'Cut-off year' shitak ayutsü nenshir

Dimapur, August 27, 2023

(TYO): Kohima Deputy Commissioner-i August 22, 2023 nü Kohima district nung non-Naga Local Indigenous Nepal/Gorkha indang draft updated list osang sangoktsüba nung June 11, 2016 tashi nung ta agütsüba magizüker aser ashishir ta Nagaland Tribes Council (NTC)-i metetdaksüogo.

Nagaland state sorkari April 28, 1978 nü Nagaland nung indigenous inhabitants atema cut-off year ji 1-12-1963 asütsü ta sangdong agüja lir saka Kohima DC-i June 11, 2016 ta ashiba magizüker ta Media Cell NTC sangdong ka

nung shia lir.

Commission Report on RIIN ya ozüng maküm saka kija kati sorkar tashi benshia RIIN report nung Part-D mapa inyaknür. Iba ya kanga dang tim masüba mapa ka lir aser Naga nunger temulung yirutsüogo ta NTC-isa ashi.

1-12-1963 nung mesüra matongdang Nagaland nung aliba Nepal/Gorkhas nunger Census agiba aser parnok nungi jakzükerterem indang digital records ayubaji junger. 1-12-1963

Non-Naga Nepal/Gorkha nungeri aiben Nagaland nung cut-off year ji 1-12-1963 asütsü shia aruogo. Nagaland

state ya nisung mashii bendenba tesem ka masü. Anungji sorkari Kohima Deputy Commissioner dang June 11, 2016 tashi nung lia arur Nepal/Gorkhas Census agitsü sangdong meyipa agitsü tetuyuba agütsütsü ayongzük ta NTC-isa metetdaksü.

Kasa mapang nung state sorkari April 28, 1978 sangdong nung aliba ama Nagaland state nung Indigenous Inhabitant ta ajatsü atema cut-off year "1-12-1963" amshitsü aser Nagaland nung tensa süngjema ayutsü atema 1-12-1963 den meputepba Proof of permanency of residence agientsü metetdaksür ta NTC-isa ashi.



Dimapur Ao Baptist Arogo lanurtemi ayongba kenten sentep sentong nung Merali Fellowship nungi lanurtemi shilem agiba noksa nung angur. Iba sentong nung DABA kübok aliba Fellowship ajak nungi lanurtemi Osang Tajung ken kaket nung aliba ken shimteta tena liasü. Ibai DABA nung küm shia akaba sentong ka lir. (Dimapur, August 27, 2023.)

All Nagaland Gorkha Students' Union tenzükshiogo

Kohima, Luroi/August 27 (TYO): State nung Gorkha kin indang tentet tejtentiba rongnung ka ta züngshia aliba All Nagaland Gorkha Students' Union (ANGSU) tanaben August 27, 2023 nü Kohima nung lokti senden akadang tenzükshiogo. ANGSU ya Nagaland Gorkha Association (NGA) indang tongtired ka ama aru saka küm ishika mapa meinyaki liasü.

Union ya Nagaland Gorkha Association, Gorkha Public Panchayat Kohima (GPPK) & Gorkha Students Union Kohima

(GSUK) teyariteng nung tanaben tentetshia liasü.

Nagaland telungzük nung Gorkha nung kaketshirtem shisaluyim aser maparen balala nung yaritepsü asoshi ANGSU ya tanaben tenzükshia liasü.

ANGSU tenzükshiba lokti senden ya GPPK Multi Utility Hall, Kohima nung agia liasü.

ANGSU anitsü asoshi Kohima nungi John Thakuri ya tir tasenba, Yommi Rai ya tongti zülur, Dimapur nungi Sunil Limbu aser Mokokchung nungi Michael Subba na ya tatong tir, Mokokchung nungi Prabhat Rai

ya repsem zülur, Chümoukedima nungi Maya Bardewa ya Finance & Treasure aser Chümoukedima nungi Upasna Rai ya Press & Information Secretary inyaksü shim.

Kasa sentong nung NGA tir Nobin Pradhan-i tajungshi o jembi aser ANGSU 1974 founding member Buddhi Bahadur Thapa-i ANGSU otsü tongmelang agi shia liasü.

Iba senden nung menden Jenny Lamechane Chettri, Vice President, GSUK liasü aser GPPK vice president Prabhu Gurung-i melepzüng o jembi.

ICCR ajanga Kohima nung 'Blending Melodies' ayongzük



Kohima, Luroi/August 27 (TYO): Ministry of External Affairs kübok Indian Council for Cultural Relations (ICCR) Zonal office Northeast ajanga horizon series programme nung shilem ka ama Concordia Academy Music Kohima den lungjemer Honibarnü Kohima nung 'Blending Melodies' ayongzüka liasü.

Iba sentong nung tongti tesemdanger ka ama jembidang Regional Director ICCR, N. Munish Singh-i ashiba agi, ken ya alima ajunga indang oshi ka amai lir aser iba ya ajanga nüburttem lungjemdaksür.

Linük nungi sempet alirtem jangjateta linük tenüng nung alima nung shilem agidaksütsü asoshi ICCR ya Ministry of Culture den külemi inyaker aser Nagaland nungia kentener aika ICCR nung

zülüokogo aser India indang cultural ambassador ama shilem agia arur, ta pai ashi.

Iba sentong nung kentener tem ya Dziese Rutsa, Pfuchazünuo, Mengubeinuo Mere, Azonuo & Atuonuo Rutsa, Visetuo Chüpuo & Ruokuoseü Sanchu nungertem liasü aser ano Coloured Key-ia shilem agia liasü.

Iba sentong nungsa Programme Executive, North Eastern Service, Akashvani Shillong Khriesaneisa Rutsa-i Tenyidie oshi nung züluba kaket "Tsiepfumia Zhoue", Singh-isa sayatsü.

Akhi tetsü-tebou mapang nungi süposolemba, oshioben aser osettsüset amala dang tejangja wazüka amshir, ta pai ashi.

Tenyimia kin indang yimsü-yimbong aser sobaliba ya alima nem metetdaksütsüla,

ta pai ashi aser iba kaket English oshi nung meyipzüksü asoshi sponsor asütsü sangdong.

Kaket zülur Rutsa-i ashiba agi, iba kaket nung Tenyimia nungeri amshiba sobaliba indang shia lir.

Ibai pa MA azüngdang thesis züluba nung shilem ka liasü saka Tenyimia sobaliba tali tejangjaba bushia region balala nungi document bendenba ajanga kaket menüngtsü küm 20 jungnüa agi, ta pai ashi.

Khrietuo Kenneth Pienyii ajanga sentong nung adenertem pela agizükba o jembi, Managing Director, De Operattas Institute Kohima, Sürhüveyi Tetseo ajanga sarasadem aser Proprietor, Concordia Academy of Music, Avi Rutsa-i melepzüng o jembi liasü.

KPC-NBOCWWB ajanga Media Fellowship 2023 nübu shimogo

Kohima, Luroi/August 27 (TYO): 2 buba Kohima Press Club and Nagaland Building & Other Construction Workers Welfare Board (KPC-NBOCWWB) Media Fellowship 2023 atema teshimtet Fellows tem Kohima Press Club (KPC) ajanga sangdongogo.

Print category nung The Morung Express (Dimapur) nungi Imti Longchar, Eastern Mirror (Kohima) nungi Reyivolu Rhakho aser Eastern Mirror (Kohima) nungi Thejoto Nienu shimogo, aser Photography category nung The Morung Express (Dimapur) nungi Caisii Mao shim aser Video Journalism kübok NLTV (Kohima) nungi Grace Khuvung alitsü.

Iba fellowship programme

nung shilem ka ama Nagaland nung kisü-jensüba tsütsü tajangshiba aser tayongzükba indang otsütem taroktiba nung zülutsü asoshi KPC-NBOCWWB media fellows nem teyari sen 50,000 agütsütsü aser parnoki September nungi November 2023 tsüngta otsü zülutsü/tangoktsü/osang abentsü aser published/broadcast asütsü.

Shimteta aliba fellows asoshi KPC ajanga NBOCWWB den lungjemer August 31, 2023 anüngdang 12:00 ako nungi tenzükba LCS Building, Kohima nung orientation workshop ka ayongzüksü. Shimteta alirtem den külemi KPC züngsem ajak iba sentong nung arua adentsü ayongzükter, ta KPC tir, Alice Yhoshü-i sangdong ka ajanga ashi.

Longleng Old Age Home küm ka jungogo



Longleng Old Age Home lapoker August 24, 2023 nü küm ka ajungba anogomung nung tangokba noksa nung angur.

Kohima, Luroi/August 27 (TYO): Good Samaritan Women Society (GSWS), Kohima tawapangba kübok Longleng Old Age Home tenzükter küm ka ajungba anogomung August 24, 2023 nü Industry Colony, Hamlikong village nung munga liasü.

Iba sentong ya Neithonuo Liegise, chairperson, GSWS lenisüba kübok agia liasü aser laisa GSWS inyaksangshi osang tongmelang agi agüja liasü.

Good Samaritan Women Society ajanga par mission ulushiba ama Longleng district nung koda masüba tia nung aliba teintet rogotem anepalutsü August 24, 2022 nü Old Age Home ya lapoka liasü.

State mesüra central sorkar nungi teyari kecha mongui Longleng nung timtema aliba teintet rogotem yaritsü asoshi GSWS ajanga iba Home ya lapok, ta Liegise-i ashi.

Iba project ya junga

amenokteta maparen shidak inyak tenzükba sülen Society-i iba project ya Longleng district nung tamang katettsüsa meranga inyakba NGOs nem amoktsütsü sentong lir, ta lai ashi.

Iba sentong nung General Manager, DIC Longleng, P. Elung Phom; president, Longleng Senior Citizens Association aser chairman, Hamlikong Village Council nungertem temia jembi liasü.

Iba sentong nung Tsüngrem temoatsü meshia N. Tialemba Phom, executive secretary, PBCA ajanga sarasadem aser Motsushumi Kikon, secretary, GSWS ajanga tarur pela agizükba o jembi liasü.

Iba sentong nung GSWS ajanga teintet rogotem nem tenüngsang agüja liasü, kong LTBC nung lanurtemi temeja ken ka aten aser Langau Phom, co-ordinator, Old Age Home, Longleng ajanga melepzüng o jembi liasü.


Mon nung AR temi medical camp & career counselling ayongzük

Dimapur, Luroi/August 27 (TYO): Assam Rifles temi Mon district nung aliba Holy Vineyard School, Bumei Village nung "We Care Campaign" künok medical camp & career counselling lecture sentong ayongzüka liasü.

Iba sentong nung kaketshir 91 den tesayur 12 aser yimtsüng nung alirtem dena mozü agia liasü.

Maneni Assam Rifles temi August 27, 2023 nü Mon jila nung süngdong atemba sentong ka ayongzükba agi. Asen takum nung süngdong-lidong koda tongtipang aser lipajen wazüka ayutsü asoshi nüburttem nem awareness agüja iba sentong ya ayongzükba liasü.

Iba mapang neem, shisham, Nagor amala süngdong tema liasü.



August 27, 2023 nü Varanasi nung G20 Culture Minister tem senden tatambangbuba sentong nung Union Ministers of State for Culture, Arjun Ram Meghwal aser Meenakshi Lekhi na den Uttar Pradesh Chief Minister, Yogi Adityanath nung adenba noksa nung angur.

NDA nungi party 5 shi INDIA nung adentsü: Alok Sharma

Nagpur/New Delhi, August 27 (Agencies): Taküm July ita nung BJP-i aniba National Democratic Alliance (NDA) teloktep senden nung adener party 38 nungi party 4-5 shii opposition INDIA teloktep den tongtepratepogo, aser parnok kobi melii India teloktep nung adentsü akok, ta Amongnü Congress party otongdar, Alok Sharma-i metetdaksü.

September 1, 2023 nü Mumbai nung INDIA teloktep senden amentsü aser iba senden nungji kanga tongtibang telemteba kar agitsü, ta Alok Sharma-i metetdaksü.

Amongnü Nagpur nung osangbenertem senden ka nung jembidang Sharma-i, "Ato kilonser Modi-ia jembiba NDA senden nungji adener party 38 nungi party 4-5 shii INDIA teloktep den tongtepratepdar.

Kobi melii parnok kari opposition teloktep nung adentsü aser kari taruba (Lok Sabha) elections matongdang adentsü akok," ta metetdaksü.

Maharashtra nung Maha Vikas Aghadi teloktep nung Congress tongti asütsü asü?, ta pa dang asügang, ajisüaka pai indangindanga telangzüba magütsü.

"Tang linük tensa apir, shirnoki lenitsü ta asübaji tongtibangba masü saka ajak longjemmer iba tetokdak sorkar atsügangdoksüji tongtibangba," ta pai ashi.

States aser region balala nung leniba party ji balala asütsü akok, ajisüaka linük longjemdaksütsü atema state ajak nung Congress-i inyaksü, ta pai ashi.

"2024 kümüji INDIA meyong asütsü," ta pai ashi.

Sangküm Rahul Gandhi-i Amethi Lok Sabha menden nungi tokteptsü asü? ta asügangdanga langzüdang Sharma-i, iba constituency nung nüburtemji Gandhi kibong den mapang talangka nungi tesendaktep lir, ta ashi.

"Teti agia Amethi nung nüburtemi Gandhi kibong nungi züngsem ka nem iba menden nungi toktepdaksüner. Amethi menden nungi tokteptsü atema Rahul Gandhi aser par kibongi dang telemteba agitsü. Iba dak sendakba nung official telemteba mali," ta pai ashi.

Taoba ita Delhi nung BJP-i aniba National Democratic Alliance (NDA) senden amen aser senden nungji party 38 dena liasü. Kasa anogo nungjisa INDIA teloktep senden mena party 26-i teloktep nungja sangdonga liasü.

Madhya Pradesh nung Dalit nunger ka zükset; nisung 8 puogo

New Delhi, August 27 (Agencies): Madhya Pradesh Scheduled Castes and Scheduled Tribes (Prevention of Atrocities) Act kübok ken o benokogo.

Ketdangsertemi ashiba agi, asür Nitin ya mapang shia ozüing alema inyaker rakzükkraktemer aser auer ka liasü.

Police-i aibelenertem pua maruba ajanga par kinüngertemi tatembangbuba asüpila sentong atsülanga liasü, ajisüaka district collector-i sorkari nenok yaritsü ta nangzükba sülen ang kinüngertemi asüpila sentongji agi.

Nitin tepsetba dak sendakba nung melung melemi nisung 8 puogo aser maneni tangartema bushidar, ta police-i metetdaksü.

Congress party Tir, Mallikarjin Kharge aser BSP tongti lenir, Mayawati nati iba tatalokba aitsüogo aser Kharge-ibo item ama tatalokba bushisügangdanga tsütsü nisung bendangshidanga atema ketdangsertem aitsü.

Iba tatalokba dak sendakba nung Indian Penal Code aser

Scheduled Castes and Scheduled Tribes (Prevention of Atrocities) Act kübok ken o benokogo.

Ketdangsertemi ashiba agi, asür Nitin ya mapang shia ozüing alema inyaker rakzükkraktemer aser auer ka liasü.

Police-i aibelenertem pua maruba ajanga par kinüngertemi tatembangbuba asüpila sentong atsülanga liasü, ajisüaka district collector-i sorkari nenok yaritsü ta nangzükba sülen ang kinüngertemi asüpila sentongji agi.

Nitin tepsetba dak sendakba nung melung melemi nisung 8 puogo aser maneni tangartema bushidar, ta police-i metetdaksü.

Congress party Tir, Mallikarjin Kharge aser BSP tongti lenir, Mayawati nati iba tatalokba aitsüogo aser Kharge-ibo item ama tatalokba bushisügangdanga tsütsü nisung bendangshidanga atema ketdangsertem aitsü.



August 27, 2023 nü Prayagraj (Uttar Pradesh) nung 'Raksha Bandhan' benjung amongdang tetsürtemi sepaitem tekanük nung 'rakhi' mesütsüdang tangokba noksa nung angur.

Taküm Maharashtra kübok Chandrapur nung aluyimer 73 soseta asü

Mumbai, August 27 (Agencies): Taküm January ita nungi July ita tashi nung Maharashtra state kübok Chandrapur district nung aluyimer 73 soseta süogo; taoba ita kija nunga aluyimer 13 soseta asüba densema lir.

2001 küm nungi 2023 küm tashi nung iba district nung aluyimer 1,148 soseta süogo, aser iba nungji yaküm küm kija nung aluyimer 446 soseta asüba densema lir.

District collector, Zilla parishad chief executive officer

aser superintendent of police densema aliba committee kati, 2001 nungi 2022 küm tashi nung soseta asür aluyimer 745 kibongtemi sorkar dang nungi senotsü teyari angutsü temsüa lir saka soseta asür alu nung aayanger 329 kibongtembo senotsü teyari angutsü temsüa mali, ta metetdaksü.

Yamaji district administration-i shidi ka ajanga sorkar dang soseta asür aluyimer kibongtem nem senotsü teyari agüjang, ta mepishiogo.

Taküm June-July nung

tzümetsüng ajanga iba district nung aluyimer 64,379 meyong ali hectare 54,514.65 nung tsünüsempogba aonsotsü raksatsüogo, ta agriculture department nungi tongti ketdangser kati metetdaksü.

Tzümetsüng ajanga iba district kübok yimtsüng 852 kongshia liasü, ta paisa metetdaksü.

District nung tzümetsüng ajanga alu raksatsüba atema agri department-i sorkar dang sen crore 44.63 teyari agüjang, ta mepishiogo.

UP Congress-i Priyanka Gandhi nem Varanasi nungi toktepdaksüner

Lucknow, August 27 (Agencies): Uttar Pradesh Congress Committee-i taruba Lok Sabha election nung Congress lenir, Priyanka Gandhi Vadra nem Varanasi menden nungi toktepdaksüner, aser iba dak sendakba nung parnokki bangdak lenirtem nem Amongnü UP Congress Tir, Ajay Rai-i metetdaksü.

Ajay Rai-i Varanasi menden nungi asemben tashi toktepa liasü saka tamakok angu. "Onoki Lok Sabha elections nung Priyanka Gandhi nem Varanasi nungi toktepdaksüner. Iba atemaji onoki bangdak lenirtem nem temepishiba ka agütsütsü," ta pai metetdaksü.

"Priyanka Gandhi-i lai melungba menden mashie ka nungi tokteptsü akok aser la nem takok ngudaksütsü atema onoki akokba tashi la nungitsü,

ajisüaka onokibo la nem Varanasi menden nungi toktepdaksüner," ta pai metetdaksü.

Uttar Pradesh kübok Varanasi menden ya Ato kilonser Narendra Modi indang parliamentary constituency lir.

2019 küm nunga Modi-i Varanasi menden nungi takok angu aser 2024 Lok Sabha elections nunga pai kasa menden nungisa tokteptsüa akok.

Kechiba Congress-i Priyanka Gandhi nem Modi den toktepdaksüner?, ta asügangdanga langzüdang Rai-i, "Pa (Modi) anema kar tashi itta lir, ta onoki osang ka sangoktsüner," ta ashi.

1991 küm nungi tenzüka Varanasi Lok Sabha constituency ya BJP tashi itta aliba menden ka lir. 2004 küm nung ang Congress-i khen iba menden nungi takok ngua liasü.



August 27, 2023 nü IAF sepaitem Exercise BRIGHT STAR-23 nung shilem agitsü atema Cairo (West) Air Base, Egypt-i apusoa aotsü mapang tangokba noksa nung angur. Iba exercise ya August 27 nungi September 16 tashi agitsü.



TIR YIMYIM YIMOBILEM (EDITORIAL)

DIMAPUR TENTONÜ, LUROI(AUGUST) 28, 2023

Asangsang nung Taoksatsüka !

Dimapur nung anogo pezü nü jakdang Inter State Bus Terminus (ISBT) nung anepbongi nisung kati iba ISBT anüksang tepsetba osangji kanga taoksatsü tulu aser shisabolutsüka lir. ISBT anüksangji pei mapa nung temulung tagütsü aser tasütait nisung ka liasü ta angazüker. Ibayongji, pai anepdang shia tangar mesakdang züngia lia ISBT ji mita oa repranger lapoktsür. Iba anepdang tia mejungi ISBT nung auer ka ia liasüba pai angu aser pai paji aputsü merangdang pa-ang auersang nem tepsetdaksü. Ibaji asenok ajak atema kanga tesasatsü tatalokba ka asütsü. Angazükba agi, ISBT anüksang tepsetsangji mozümora achir asangur ka liasü, anungji pa mozü achitsü atema ISBT nung anena akaba garitem nungi osettsüset auyatsü merangba mapang iba lendong ya atalok. Atangji, asenok karibo asen lima nung mozümora achiba tebilemtsü aliba ya mangu, memetet aser majangshidang nungji mamangi alitsüa akok, saka iba tebilemtsü ya asangsang aser mozümora achiri nisung tepsetbajia shitakba ataloker. Joko, asen lima nung asen kibong aser asen lokti menendaksüba mozümora achiba temenen ya angashir mangashi ama aser ngur mangu ama yimbazüa toktsütsüla masü, kechiyong mozümora achiba lokti menendaksüba mapa ya mozü achirtem asoshi dang masü saka mozü machirtem asoshiang lendong tuluba kümogo. Tang atalokba lendongjia jungjunga bilemdangra, mozümora achiri mozümora machir ka tepsetba mapa ka lir. Aji oda, tanü asen lima nung lokti menendaksüba mapatem rongnung tetsübuttsü aser nükenbelemtsü mapa tulu kaji tamachitsü mozümora achiba ya asütsü. Ashiko, asenok aikati asen lokti nung mozümora achiba ajanga bener arutsüba timtem aser lendong indang memetet aser majurudangi alitsüa akok, ajisüaka item kija aser kibongtemjia iba lokti mendendaksüba lendong nungi jenbua malia ta angatetdi. Ibai tashidak wara amai lir, anungji iba tashidak wara jagi matongtsüsa kümdanga alitsüba dak alaka shingaia ' kü dakbo iba tashidak jagi matongtsü' ta ashitsü makok. Aji oda, mozü mora achiba tebilemtsü yaa tashidak wara süiba ama mapang shia yimya balala nung süir. Khen khen yi wara, khen khen khani wara, khen khen aket mozü ajemba wara, khen khen ganja achiba wara, khen khen mozü süngjang achiba aser khenkhenbo ajem agi atuba wara ta mapang shia lokti temenen wara balala agi semdang. Tang ya akhi mapang süiba drugs wara heroine aser brown sugar wara ama 'Sunflower' mozü wara agi semdangba mapang lir. Ibai süngjang masü, ajem-a masü aser süngo tua masü saka ibai tereprangtsü nung amtsük yangluba am amai lir. Iba achiba ya memenemer aser nisungi repringtettsüsa memeseper, ajisüaka nisung tajungba akümer amai o tanep, tesasa, teinyaknü aser awashi temetet amai akümer. Iba mozü tenünga 'Sunflower' asünungji karibo tatsüba agi SF ta ajar, aser aikati nara tapu ka indang jembir alitsü südi ta bilemer. Iba mozü ya am dang asünungji tayokertemia melamelaa tanga osettem den külemi bener jajateter. Iba jagi Sunflower mozü ya aiben mitkartemi sapon pongdang mesüra moko menünger achiba sata pongdang tilala nung shibelenba mapang putetter. Joko, tanübo asen lima nung balaka, iba mozü yagi school nung azünger tanurtem dak tashi tongogo. Arogo nung shilem agir lanurtema aika iba wara nungi jenbua mali. Iba mozü ya chir külenang sentep sentong nung shilem tajungba agitetter, anungji tsürabur aser lenirtemi meputetter. Iba drugs wara yagi kibong aika kangshidagi aser nisung aika taküm samadagi. Atangji, chiyongtsü mangu ayaba agibo nisung yiar küma ainbo madoker saka sunflower chibaba mozü lar ka atemabo mozüji machi taküm alitsü makok, anungji auyatsü aser tang atalokba amaji nisung taküma mapayui inyaksü. Item jagi tsürabur kidang auyatema auyar lokti meyong oset nunga amdaksü aser tenla kidanga tanüker ayutsüsa akümtsü. Aji oda, tarutsü lokti, yimten aser arogo lenirtem asütsüba purtem to mozü lar aküm nungji, oda-oda yimten agi yimten memesük aser arogo agi arogo memesük küma aoba asenoki angur. Iba amaisa ao nungbo memenui asen lima nung tatar yimsüsür aser arogo tenzükertem senden nung dena mozümora lemsatempa achiba tensa asenoki ajurutsü. Idangjibo, asenok mozü lar dang masü tangar bendanger lar kumadoktsü. Iba timtem aser shisabolu yagi yimten aser arogo aoksar apusotsüla.

OLEMSABANG

YIMJUNG POKÜMER MALI

~ P. Renthly Jamir

(Yashi adok nungi...)

Tanabuba Manipur state taküm May ita tetenzük nungi Nagaland kidangsür Manipur nung kin ana raratepa taküm jenti laluba den kiojen tenla ki ajak aoyi kümer nübur ayako tia nung aliba India lima dang masü England America tashi oa anakshir. Saka P.M Modibai ola kata madok. Anungji opposition telok lungjemer No Confidence motion parliament nung benok Manipur nung Lokh Sabha M.P ana lir ka BJP Rajkumar Rajan Singh minister of State For External Affairs and Education. Ka NPF party nungi adokba Lorho S.Pfoze (BJP ally) par lima nübur timtemba indang No confidence motion debate nung MP Rajan Singhia O kabosa shidangnür saka par party BJP temi mapang memela. Ano NPF MP Lorhoia nüburi shimer parnok atema jembitsü yok asünung O kobasa shinür saka par telok BJP temi jembitsü nongtem. Pai yamai ashi (My friends from alliance group particularly from BJP they said that Honourable Grih Mantriji (Home Minister will speaking on Manipur so it is advisable not to speak). Home Ministerbai jembitsü aji agi peridakjang. Kibur dang jembitsü memelayonga kidangsürbo Tsüngrem ka dang ta jembir anungji Mizoram Rajya Sabha MP shiba MNF telok BJP den teloktep lir. K.Vanlalvena pai kidanger atema O kabo shinüa aiben mepishi saka Rajya Sabha Chairman J.D. Dhankari memela parnok BJP party asemer, saka iba nung ya opposition telok po sema yari. Kechiyong kidangsürba yariteper .Shitakba Manipur den kidangsürji Nagaland lir asenokbo nübua mezütepa lir. Saka lai nung ashiba atalok kiyonger dak nenoki temulung telem akang tembar dak nenoki tamang teka Mika-7-5. Asen sobaliba nung kidangsür asüdangbo anogo asem nü lepko amunger. Saka kidangsür süa yur alui ao ama asen kidangsür yamai timtema Naga nunger M.P Tokheho Yephthomia aria bilema O kata meshidang S. Phangnonia ola kata madok. Item ajak melena parnok raratepdaktsütsü NAP armed branch Inspector Michael Yanthani SLR injang 1500 aser 5.56 Calibre injang 1000 ta sen 4.25 lakh agi ayok. Saka Nagaland nung political party Congress, NPF, RPP telok shingia yabo tim masü government tashi mait ta ola kata madok. Alimai relief camp nung alir atema chiyungtsü yoker, Khristan state-i bunker nung alir atema injang ayoker. Kechiaser parnoki yimjung indang mejembir. T.Ken 35-20.

Ano kodang President Vladimir Putini Russia army ajak prokshitsü mobilization of reservists forces) ozüng agütsü arogo lenir putirtem ajak Moscow yimti nung sarasademdak (Altar) sentepa shingaia Ukraine lima yimjung atema sarasadem masütsü saka Russia army takok atema dang sarasademtsü (replacing peace with victory). Putir ajak külem metema sarasademba (total conformity of patriach's prayer for victory). Shibai iba nung manidakdir ochi mashir ta mulung malemstsü (His loyalty is suspect) aser tamang mekateter arogo nung shilem mali (No place for you in the church) saka putir shibai yimjak nung raraji posema shidir pa atema yimten nung tetsübuttsü mali arogo tenzükbba wadang nung anentsütsü tachidaktsü maka.Rara tenzükli public kari meraratsüla ta ayongzüka public letter calling for peace in Ukraine ta sür par putir 40,000 tema dang meyongnem meshia ao tsübuseta parnok 300-i dang signed asü. Joko putir 30 bo mapa nungi anendaktsüogo ta ashir. Putir semer mapa nungi anentsür rongnung Rev Loann Koval pa anenba kulijia O ojang ka melenshia sarasademba (just one word changed victory with peace) takok melena yimjung Ukraine nung yimjung lidakjang ta ojang ka melenshibaji arogo obendangdak pa anentsü kuli teperi (It was enough for the church court to remove his priestly rank) pai local arogo ka nung Russia army tushia mejembiba agi sen achi ta shir. Pai teka külen laishiba külen candle ka ta amer "Ni Tsüngrem tenzüker putir mapa anema yimten dang apudaktsü kü shi azü agi magizükteter (It went against my conscience I could not submit for this political pressure from the hierarchy).

Iba putir amajisa ano Rev Andrei Kordochkin Pa-a Ukraine nung yimjung alitsüla ta asüba atema küm 13 putir sobutsü (black robe) sobur inyaka aliba agizüka yur, pai ashi, Lashibai melaba ozüngtemji yimten nung tenokdangtsü oset ama ka dang amshir (Cannon law is simply used as a mechanism of political repression) pai tetenzük nungi Ukraine nübur yimjung atema sarasademtsü .aser ashi, arogo lenir ka mapaji kechi südir süang arogopur dang yimjung indang sangtongtsü ajemajema malitsüla (we have a duty to speak out whatever the cost of that will be) Nübur timtemba ngua putir ka koda ajemajema litettsü. Davidibo Tsüngremdanga "Kü nüktzü ngur na ola madoki teli" T.Ken 39-12 ta ashiba angur. Ukraine nübur aser Russia nung putir ochi kulisürtem atema sarasademtsütsüla.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

'God Loves You Tour' sentong nung nisung meyrjang aika aden



August 26, 2023 nü London ExCel nung Rev. Franklin Graham indang 'God Loves You' tour sentong agidang tangokba noksa nung angur.

August 27, 2023: Honibar aonung (August 26, 2023) London ExCel nung Rev. Franklin Graham indang 'God Loves You' tour sentong nung nisung meyrjang aika aden; yaküm London nung agiba sentong dang nungibo taküm nisung teimba teimba liasü, ta sentong ayongertemi metetdaksü.

Taoba hopta interview ka nung jembidang Rev. Franklin Graham-i London nung alirtem den Khrista osangtajung lemsatepsü mission metetdakja liasü.

Sayutsüngir Graham-i, "Onoki sen memeshir; onoki tenla mebendener. Menden ajakji angati dang asütsü. Kü nükjidong, teimla aser sarasademji nisung aikati Yisu Khrista dak amangtsü aser Khristaji Kibuba aser Kümtetdakba, ta agizükdaksütsü atema lir," ta metetdaksü.

Yaküm-a Graham-i Liverpool, Newport, Sheffield aser London semdanga liasü.

2024 küm OVO Hydro Glasgow nunga pai God Loves tour sentong agitsü.

Laishiba nung ajemdaker pai kasa tebur o tebur na mesüra tetsür o tetsür na shi nung medemba aitsüba ajanga yaküm sentong agitsü aliba tesem kar thinenja liasü; iba ken o nung pai takok anguba sülen pa tanaben UK-i oa iba tour agitsü.

Interview nungji tasüngdangba ka langzüdang pai, "Onük kar nung ajemdaker nisung karibo Tsüngremi jembitsü alibaji manganer. Onüktem rongnung kaji, kasa o kasa shi nung medemba lir. Atangji Tsüngremi ajak meimer. Pai kasa o kasa na shi nung medemertema meimer. Ajisüaka asenoki Tsüngrem dangi ora kasa o kasa shi nung medembaji anenadoktsüla. Ni yamaji jembibaji telok kari ashishir, ajisüaka ibaji Tsüngremi jembiba O lir. Iba ya Franklin Graham-i jembiba o masü, kechiyong ni temzüngtem meyanglur. Tsüngremi meimchir yanglu aser temzüngtem yanglur," ta metetdaksü.

"Anungji telok ka jagi item ochi oji manganüi sentong agitsü aliba tesemtem jagi ao aser contracts thinendaksü. Iba

sülen coronavirus wara aru anungji sentongtem magiteti liasü. Onoki okadak iba ken o atema rara, kechiyong iba ya pei tebilemba sadema jembiba aser tamangba yimsü sadoka amangba onük ka lir. Tesüsa onoki takok angu. Iba takok ya Franklin Graham indang takok masü saka Arogo atema takok lir," ta paisa metetdaksü.

God Loves You tour sentongtemji ajak atema angati dang asütsü. Item sentong ya Arogo 1,000 dak tema den senteper ayongzükur.

Tan ita tetenzüklen Billy Graham Evangelistic Association (BGEA)-i sangdong ka ajanga, iba tour atema parnoki ano tesem ana bendenlokogo; mezüngbubaji August 26 nü ExCeL London convention center nung agitsü aser tanabubaji June 22, 2024 nü Glasgow, Scotland nung aliba OVO Hydro arena nung agitsü, ta metetdakja liasü.

Yaküm "God Loves You" tour UK nung nisung 1,400 dak temai Yisu Khrista agizük. Iba tour ya Liverpool, South Wales, Sheffield aser London nung agia liasü.

Arogo minorities scholarship ochimashi bushisüngdangtsü akhanger

August 27, 2023: Arogo lenirtemi India sorkar dang Khristantem densema minorities nem scholarship agütsüba maparen nung ochimashi inyakba bushisüngdangtsüla, ta takhangba agütsüogo.

Indian Ministry of Minority Affairs-i telung nung bushisüngdangba ajanga, Khristan kaketshirtem densema temsüa alirtem nem scholarship magütsüi temsüa malirtem nem scholarship agütsüba sen ajak agi crore 144.83 shi liasü, ta bushitet.

"Minority atema scholarships nung ochimashi alibaji jungjunga bushisüngdangtsü onoki akhanger," ta Kerala Catholic

Bishops' Council indang Commission for Social Harmony & Vigilance Secretary, Michael Pulickal-i metetdaksü.

Carmelite of Mary Immaculate nung putir, Michael-i, tesüiba küm pongu tashi ozüng alema temsüa malirtem nem scholarships agütsüogo, ta metetdaksü.

"Linük nung state 21 nung iba ochimashi mapa inyakogo," ta August 22 nü Commission for Social Harmony & Vigilance-i metetdaksü.

Commission-isa Centre sorkar dang iba ochimashi nung shilem agia alirtem nem temerenshi agütsütsüla, ta takhangba agütsü.

Catholic Arogo kübok

Catholic Congress Global Samiti (council)-ia sorkar dang minority scholarships ji temsüa alir kaketshirtem nem dang agütsütsüla, ta ashi.

India sorkari minority kaketshirtem class 1 nungi tenzüka temaba shisaliok bushitsü atema senotsü teyari agütsür. Iba mapatong ya 2007-2008 küm nungi tenzüka liasü.

Iba scheme ajanga linük nung shisaliok reju 1,80,000 shi tajangzük angur.

Nütsüng billion 1.4 aliba India linük nung nütsüng shilem 80 dak temabo Hindu nungertem lir, aser tanüngba nütsüng shilem- Khristantem, Muslims, Sikhs, Buddhists, Jains aser Zoroastrians (Parsis) tem ya minorities ta züngshir.

ANO GO ABEN TSÜNGREM DEN

Temetetba Yinzü Ka

T. Ken 119: 169 - 176

Tekong 169 nung tanelaren temetetba yinzü ka indang sayur. " O Kibuba, ni ayimtenba na anasa arudakjang:Ne O amato kü nem tangatetba kua."Sarasademi tangatetbaleni anir. Ibai mezübuba temetetba yinzüji lir.Nai Laishiba azüngdang tangatetba asoshi sarasadem asür asü masü? "Ne ozüng nungi tesüngmangtsü osetemi ngutettsüsa, nai kü nük lapokjangma" (t.18) ta nai sarasadem asür asü masü?

Tanabuba, tangatetbai nüjiba dangi anir. " Kü temepishiba ne madangi arudakjang: Ne O amato ni kümzükangma (t. 170).Ken züluri ochiba Tsüngrem nungi aruba nüjiba asüngdang. Yisui ashi, "Nenoki ochi metettsü, aser ochi jagi nenok nüji kümdaktsütsü" (Yn. 8: 32).Alima nung talenba tulutibaji tiyazü lir; saka nai Tsüngmer ochiba nung amangra, na nüji lir.

Tasembuba, ibai tanelaren lemtetba yinzü ka lir.Tekong 171 nung angu, " Kü bang agi tenüngsang adokdakjangma: kechiyong nai ne telatet ozüng kü dang sayu." Nüjibai tenüng asangba dangi anir. Kodang asenoki Tsüngrem ozüngtemji anagatetter, asenoki ken atentsü akok. Pa O metetba ajanga Pa tenüng asangtsü jangradaktsür.

Tatemsä, tenüng asangba jagi kuli süba dangi anir. " Kü meli agi ne o indang ken tendakjang; kechiyong ne temelaba ajak temeshi lir" (t. 172).Asenok kuli ajanga mamangi alirtem Yisu Khrista dangi parnok Kümtetdakba ta agizüka arutsü.

Tsüngrem O ji zügang aser sarasademang, aser Tanela Temeshii ne taküm melenshidaktsüba maoaji tenzükan.

Oliver Anthony-i 'I want to go home' ken saya



Oliver Anthony

August 27, 2023: Laishiba nung aliba Lai tekong-Osangtajung kentener, Oliver Anthony-i "I Want To Go Home," ta ser ken tasen ka sayaogo.

"I Want to Go Home," ken ya taküm March ita nung TikTok nung lemsatepa liasü saka August 22, 2023 nüa ang music video ji YouTube nung lemsatepogo.

Iba ken nung kenjangji yamai lir, "World War adoktsüsa aliba tensa ka nung asenok alir aser joko shingai sarasadem masür ama ni bilemer. Ni apudaker aser Kibuba dang ni kidangi aniang ta sarasadem." Music video ji tatembanglen

Laishiba nung aliba Lai tekong-"Nisung kati alima ajak ajangzükaka pa tanela samara iba jagi pai kecha ajangzüktsü?" ta zülua lir.

Tawa pai atenba ken "Rich Men North of Richmond" ajanga Billboard Hot 100 song chart nung temaba jenjang (No. 1) tongtetogo.

August 11, 2023 nü Anthony-i sayaba ken "Rich Men"ya country ken ka lir.

August 22, 2023 nü "I Want To Go Home" music video sayaba sülen iba ken 'views' million 3.2 jungogo aser YouTube trending charts nung jenjang 29buba nung lir.

AO OSHI ANGAZÜKDAK:
TANÜ ANGAZÜKTSÜBA OJANG



Rüpo

(n) manü tu akongba (dried yam leaves)

* Rüpo nung ango enoka asoba kanga junga achir.

Rüpozü

(v) tipmatem senzü (keep on moving restlessly)

* Manenba kidang ajemajema melitet rüpozü.

OLONG PAITEP # 6618

Grid for Olong Paitep # 6618 with numbers 1-24 in various positions.

TIPIEN

- 1. Saku - (4)
6. Songjen - (7)
7. Mali/Tazüing - (4)
9. Tasen apok - (6)
11. Songtem - (3)
13. Ata liasü - (5)
16. Tzünglu denkülemi tsüker - (3)
17. Aso tila - (6)
20. Tashi maküm - (4)
24. Tenüing kasa jatöpba - (7)
25. Ki yangluba oset - (4)

LANGTSÜNGLEN

- 1. Taksep - (3)
2. Langtem - (5)
3. O tamendaktak - (4)
4. Nütsü tebuba - (3)
5. Anüingdang tesangwa - (3)
6. Apitet - (5)
7. Yagi jungdaksür - (4)
8. Anogo semer ka - (3)
10. latsü - (3)
12. Tebur kidong aser zünga kasa tsüingda jatöpba - (4)
14. Pela agizükba tapu ka - (5)
15. Tenüing atet - (3)
18. Mejanga onü - (5)
19. Talak techira - (4)
21. Maneni - (3)
22. Nübo teyi - (3)
23. Meshi - (3)

OLONG PAITEP # 6617 TELANGZÜBA

TIPIEN :

- 2. Pongsen, 5. Lepko, 7. Omen,
8. Maangka, 10. Yangkhu,
12. Senpong, 14. Angu,
15. Raksa, 16. Arameso,

LANGTSÜNGLEN :

- 1. Alimang, 2. Pongen,
3. Samaru, 4. Nün, 6. Pio,
9. Nüingdak, 10. Yongya,
11. Kongro, 13. Ora, 14. Ata.



PUTIR KA GARI KANGA KARAA ANIR AOBA NGUA DUTY NUNG ALIBA POLICE KATI ARRSHIA OR MENEPER :

Police :Na kanga speed nung anir ato ya, challan katitsüa no, aree na yi ajema na?

Putir :Majemako, ni yi khenyongi majema, tzü küla ajemako.

Police :Arree, nü gari tasüing yi yi dang menembaya koda?

Putir :Sayangtetogo, ni amangba Yisu ya tesüingmangtsüa. Pa taküm alidang Kana yimdak kiyir benjong amato, sayatenyara nii.

Police :Mepurashii dang jong, police stationi.

~ Lilir : WhatsApp

Tanur asoba anogo nung salem osang den noksa angati adokdaksünüra - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.

New Lambulane nung ki 5 rongdoktsüba agi tensa raksa



August 27 nü Manipur kübok Imphal East district nung mejangjba nisung kari New Lambulane nung ki rongdoktsüba noksa angur.

Imphal, August 27, 2023

(Agencies): August 27 nü Manipur kübok Imphal East district nung mejangjba nisung kari New Lambulane nung ki pungu rongdoktsü.

New Lambulane nung alir kari mi senoktsü asütsü kechiyong iba lane nung exit points ajak atsüdanga lir aser CRPF personnel-i anüker ta iba tesem nung alirtemi ashi.

"Mapang ajak nung SSB personnel-i lenmang tongtipang anüker anungji

Kuki nunger dak alaka tangar arutsübaji tamakoktsü. Iba ajanga Kuki nungeri parnok sasa mi senoktsü aser ibaji Meitei nunger kitem nung kaoloka ao" ta New Checkon Bazar Women's Association Meira Paibi Secretary Huidrom Malini-i ashi.

Ki rongdoktsüba nung temulung melemba agi iba temeket nung alirtem lenmang nung adenshi saka police-i tenük amdaktsüba tangola amshia nisungtem

senshidaktsü.

Imphal city nung tensa raksatsütsü meranga ki rongdoktsü ta public-i lungkak aita apusodang police den mangatettep adoka raratep.

State sorkari August 29 nü Manipur Legislative Assembly Session alitsü ayongzüka lir.

New Lambulane ya nisung temeyoktep aliba tesem ka lir aser lendong nungi kümzüka ayutsü atema security forces mapa lemezükja lir.

Taoba RIMS Director security indang prangpong rakzük

Imphal, August 27, 2023

(Agencies): Deobarnü mejangjatetba nisung kari Regional Institute of Medical Sciences (RIMS), Imphal nung taoba director indang security guards ket nungi prangpong-injang rakzüka bener ao.

Tanep 2:00 ako meta nisung kar AK-47 rifles amer taoba director Dr Rajo'er kidangi aru aser AK-47 rifles 2 aser carbine 1 den injangtem rakzüka bener ao.

Security guards-i prangpong-injang rakzüka nisungtem mejangjateter. Parnok ya Sagolband, Imphal West district nung taoba director Bijoy Govinda'er kidang mapa lemezükja liasü.

Iba tatalokba atema police-i ken o ka benokogo aser bushisüingdang südar.

Manipur kübok tesem balala nung central security forces aser Manipur police-i prangpong-injang aika nguteta

aruba mapang prangpong rakzüka bener ogo.

Tawa tu sepaitemi Dolaithabi dam area nung prangpong 16 nguteta liasü. Iba tesem nung parnoki carbine 1, Sten gun 1, grenades 4, ammunition 70, explosives 16 aser tanga osettem aika ngutet.

Tesüiba ita 3-4 tsüingda tenemlen prangpong 1,000 tema aser lendenlen prangpong 2,000-3,000 shi ka auyaogo ta Manipur police-i ashir.

IFS officer Ghosh: Mezüingbuba tetsür KNP field director

Guwahati, August 27, 2023

(Agencies): Indian Forest Service (IFS) officer, Sonali Ghosh-i Assam nung aliba Kaziranga National Park nung mezüingbuba tetsür field director inyaktsü.

Assam sorkari Kaziranga National Park nung field director inyaktsü atema Sonali Ghosh shimba osang metetdaksüogo.

August 25 nü sorkari iba sangdong agütsüogo.

IFS officer Ghosh ya tang



Sonali Ghosh

Forests inyaker.

Lai September 1 nü director Jatindra Sarma ket nungi mapa melenzüktsü. Sarma ya August 31 nü mapa nungi sodi angur.

National Park nung küm noklang ka shi tetsürtemi mapa inyaka arur saka tetsür kati field director inyakbajibo Ghosh ya mezüing asütsü.

Alima nung tezü ka aliba güntok teimtiba alidakji Kaziranga National Park lir. Iba park ya UNESCO World Heritage site ka lir.

Congress-i Titabor Municipal Election nung takok angu

Jorhat, August 27, 2023

(Agencies): August 27 nü election nung takok anguba sülen opposition party Congress-i Bharatiya Janata Party (BJP) ket nungi Titabor Municipality ketdangsubaren agiogo.

BJP mayor, Rajiv Dutta

(Ward No. 10) aser Ward No. 8. commissioner Nipa Chutia Lahon nati mapa nungi anenba sülen BJP ward commissioner anati Congress nung aden.

Titabor Municipality Corporator Rupa Dutta indang mapa nung temulung masüba agi iba ya atalok.

President Bhabesh Kalita aser General Secretary Phani Sharma nati ward commissioner tem mesüzük ta osang angazüker.

Mapa nungi anenba commissioner tem ya Guwahati-i jaok saka parnoki ibaji magizük ta osang ajanga ashir.



Ato Kilonser Benjamin Netanyahu indang sorkari judicial system melenshitsu sentong yangluba anema longkak aita Israel nungertem hopta 34 buba Tel Aviv, Israel nung adenshia aliba noksa nung angur. Banner tuluka nung Netanyahu aser pa kinungtsü Sara indang noksa aser teküpoklen Hebrew oshi nung "Linük rongdakjang" ta zülua aliba angur. Ato Kilonser Benjamin Netanyahu-i judicial system melenshitsu sentong yangluba anema Israel nunger meyrjang aikati longkak aita arudagi.

Zimbabwe Tir Mhangagwa-i election tanaben kokogo

Harare, Luroi/August 27 (Agencies): Zimbabwe tir Emmerson Mnangagwa-i election tanabuba aser tatembangbuba term kokogo, koba opposition-i magizüker aser election asadangertemia ashishio.

2017 küm army-i sorkar atsünga sülen Mnangagwa yagi Robert Mugabe melena liasü aser taküm iba election ya pai akoktsü imla liasü. Ken o asadangertemi ashiba agi tetoktepa ya ZANU-PF party-i akoktsüsa jenjang ka nung lir, shirnoki 1980s nung temesüng nisungtem yimsüsüba tembangba sülen nungi linük yimsüsüa aruogo.

Mnangagwa-i vote shilem 52.6 angu aser pa den totokteper rongnung tongtiba Nelson Chamisa-i vote shilem 44 ngua liasü, ta Zimbabwe Electoral Commission (ZEC)-i Honibar aonung menor sangdonga liasü.

"ZANU-PF party nungi Mnangagwa Emmerson Dambudzo Republic of Zimbabwe tir asütsü shimba sangdonger," ta ZEC mendenbula Justice Chigumba-i osangbenertem dang ashi.

Election mapang vote agütsütsü asoshi kanga menomeyangtepa liasü aser iba ajanga opposition temi ochi mashi inyakyim densema aliba aser voter tem tashiyim agi azüoktsü meranger ta shia aitsüogo, saka linük yimsüsüa aliba party pusemertem telok tila kati pa tir asütsü asoshi shimba benjungtepa liasü.

Chamisa-i aniba Citizens Coalition for Change (CCC) party nungi otongdar Promise Mkwanzani-i ashiba agi, par party-i final tally nung sign masü, koba pai ashiba agi tai lir.

"Onoki result agizüktsü makok," ta pai AFP news agency dang ashiba den party-i yakta parnok indang taruba jenjang sangdongtsü, ta metetdaksü.

Africa anüolentip nung aliba linüktemi iba election ya kanga junga ladanga ataogo, koba Mnangagwa-i aniba ZANU-PF party tetendangba ka ama liasü, shirnoki linük küm 43 tashi yimsü asüba mapang rongsenketzüng jung achaayang mesütem aser tashiyim agi yimsüsüa aruogo.

Bendanger election asadangertemi Hokolbarnü ashiba agi, iba election yagi regional aser international jenjang metongtet.

European Union indang observer mission tekolakba-i Hokolbarnü ashiba agi, election ya tetsübu nung agiogo. Southern African regional bloc SADC indang mission-ia, ken o tem rongnung vote menor agütsü tenzükba, voter roll dak sendakba nung tetsükdaksü aliba, opposition party nüboyimba sentongtem asoshi tenokdangba agütsüba aser state media-i party bendanga amshia osang agütsüba densema lir ta metetdaksü.

ZANU-PF-i ashiba agi, parnok asoshi maongka kecha balaka talila magütsü aser election result melehsütsü asoshi ochi mashi inyakyim kecha minyak.

ZEC nungi Chigumba-i ashiba agi, arishi küm 80 tain Mnangagwa-i vote million 2.3 dak tali nguogo aser arishi küm 45 tain Chamisa-i vote million

1.9 dak timba ngua liasü.

Vote agütsüba tesadang dak tali akokba sülen tir atsüngtoktsü asoshi tamakoktsü kümogo. Election atema züngoksema aliba voter shilem 69-i shilem agia liasü.

Witwatersrand University nung politics lecturer Nicole Beardsworth-i ashiba agi, Honibarnü osang sangdongba ya lai SADC aser tanga election observer temi ken o aitsüba atema telanzüba ka agütsüba ta bilem.

"ZEC-i tir election indang result kanga kara sangdongba atema asenok ajak mulung nung tashishiba aika lir," ta lai ashi.

Mugabe dang ya "The Crocodile" ta ajar aser pa Mnangagwa nongita yarir tongtibang ka liasü, saka pai Mugabe atsüngtok.

2018 küm election nung pai Chamisa arierna akok. Iba election nung ochi mashi inyakyim sendaka lir ta shia opposition lenirtemi aitsü, ajisüaka constitutional court-i iba result ya agizüka liasü.

Khan-i Pakistan sorkar indang kuli kaketter meshidak amshiba nangzük

Islamabad, Luroi/August 27 (Agencies): Tepuokdak yua alisang taoba ato kilonser Imran Khan-i 'confidential diplomatic cable' meshidak amshiba nangzükogo. Diplomatic telegram mesüra embassy cable ya embassy mesüra consulate ama diplomatic mission aser par foreign ministry tsüngta miima ojang amshia osang bentepba/zülutepba dang ajar.

Tongtipang kuli kaketer tim masüba nung amshiba asoshi Official Secret Act kübok Pakistan nung tematiba investigative agency ajanga Attock Jail nung pa dang asüngdangya süa liasü, ta osang ajanga ashir.

Arishi küm 70 tain Khan ya ochimashi ken o ka nung ita tetenzüklen court kati küm asem tepuokdak ayutsü obendang agütsüba ama tepuokdak lir. Tang jembiba cable ya Khan-i mapang talangka nungi US-i yaria pa taoba küm ato kilonser menden nungi atsüngdoktsü tasa

yangluba kuli lir ta jembibaji lir. Pa ato kilonser menden nungi matsüngdokdang 2022 küm april ita rally balala nung Khan-i kuli kaketer ka ayiplojka liasü aser ibaji bendanger tasa indang kuliji lir ta shia liasü.

US nung aliba Pakistan indang embassy nungi aruba 'confidential diplomatic cable' ka nung aliba o tem yimjak nung prokshiba mechi Pakistan Tehreek-e-Insaf mendenpuba ya Official Secrets Act kübok ken o benoka bushisüngdangba alitsü.

Federal Investigation Agency (FIA) indang counter-terrorism wing (CTW) ajanga Honibarnü tepuokdak taoba ato kilonser semdanga liasü. FIA osang ajanga ashiba agi, FIA Deputy Director Ayaz Khan-i anir züngsem trok aliba joint investigation team-i Khan den Attock Jail indang deputy superintendent office nung ajurua ghonda ka dak tema asüngdangya asü, ta Dawn osangkaket ajanga ashi.

Asüngdangyaba mapang

Wagner tekolakba Prigozhin tayimtsü tsükokdak asüba jangjaogo

Moscow, Luroi/August 27 (Agencies): Bodhbarnü tayimtsü tsükokdak ngutetba nisung temang indang 'genetic analysis' agiba sülen Wagner tekolakba Yevgeny Prigozhin asüba jangjaogo, ta Russian ketdangsür temi ashi.

Investigative Committee (SK) ajanga ashiba agi, asür nisung ter prong jangjatetogo aser iba tayimtsü indang passenger list den puteper.

Prigozhin meyong tayimtsü ya August 25 nü Moscow north-west tsütsü tsükoka yangji mena alir ajak asü.

Iba tayimtsü tsükokba asoshi Kremlin dak temolung meleme lir, saka parnoki magizüker.

SK ajanga maneni mapa tamajung inyakba bushisüngdang ta shiogo.

"Molecular-genetic testing tembangogo. Iba indang results ajanga asür par ter prong jangjatetogo aser parnok ya tayimtsü mapusodang tayimtsü nung mena alirtem tenüng bendenba den apeter," ta SK sangdong ka ajanga ashi.

Iba lendong nung asürtem rongnung Wagner nungi lenirtem kar dena lir. Wagner ya Prigozhin-i tenzükba Russian mercenary group (sen yong raraba) ka lir aser parnoki Ukraine, Syria aser Africa tesem kar nung shilem agia rarar.

Asürtem rongnung Dmitry Utkin densema liasü, shiba Wagner indang military operations ketdangsüa liasü.

Moscow nungi St

Petersburg bushia aoba Embraer Legacy tayimtsü nung mena alirtem rongnung Wagner züngsem Valery Chekalov, Sergei Propustin, Yevgeny Makaryan, Alexander Totmin aser Nikolay Matuseyev liasü.

Iba tayimtsü ya pilot Alexei Levshin aser co-pilot Rustam Karimov nati anir liasü aser yangji flight attendant Kristina Raspopova liasü.

Prigozhin-i anir Wagner sepaitemi Russian armed force anema nokdaka linük south tsütsü Rostov yimti amokbanga ano Moscow leni aotsü amokmerener ita ana lir iba tayimtsü ya tsükoker.

Iba mangatettep adokba ya tezüngzüktep ka ajanga benteta Prigozhin aser Wagner sepaitem Belarus nung oa anenok.

Ajisüaka Russia Tir Vladimir Putin-i 'mutiny' ya tesülen nungi atsünga lir ta ashi aser tayimtsü tsükokba nungya Russian security forces densema alitsü südi ta jembir.

Tayimtsü nung apokba ajanga tsükok iba lendong ya ajurua alitsü amai bilemer aser Prigozhin ya sür alitsü, ta US ketdangsür temi shia liasü.

Tim masüba mapa kar inyaka alitsü südi ta jembiba ya khenyongi tiazü lir, ta Kremlin odongtar Dmitry Peskov-i Hokulbarnü shia liasü.

Putin-i asür kinungertem den asükhu lemsa aser Prigozhin ya sempet aketba nisung ka aser taküm nung aibelen tulu inyak, ta shia liasü.

US media outlet The Intercept ajanga iba 'secret cable' nung aliba copy kar temai adokba sülen Khan den asüngdangya tali asür, iba kuli temai adokba asoshi Shehbaz Sharif-i aniba taoba sorkari PTI tekolakba dak tongloksür.

Ita tetenzüklen The Intercept ajanga osang ka adokba nung, "US State Department ajanga March 7, 2022 nü senden amendang Pakistan sorkar dang Russia-i Ukraine amakba nung Imran Khan anatsülen kasa aliba mechi ato kilonser menden nungi atsüngdoktsü ajungshi ta cypher nung shia lir," ta shia liasü. Ajisüaka iba kuli kaketer ya jangjatsü merang saka Pakistan nung tensa majungba ajanga Pakistan sorkar nungi kuli tejangja mongutet, ta shia liasü.

US State Department-ia iba kuli kaketer mejangjatsü ta shiogo. Toshakhana ochimashi ken o nung aibelena aliba puteta Imran Khan ya August 5 nü pua Attock Jail nung yua lir.

Prannoy-i World Championships nung bronze medal angu



Luroi/August 27, 2023 (Agencies): India nunger badminton asayar HS Prannoy BWF World Championship 2023 semifinals nung kanga meranga asaya ajisiüaka Thailand nunger asayar Vitidsarn 21-18, 13-21, 14-21 agi mekoki bronze medal dang nguteta liasü.

Prannoy aser taoba kum World Championship nung silver medal angusang Vitidsarn na August 26 nu semifinal asaya, ajisiüaka Prannoy-i takok monguteti bronze dang angu.

BWF world ranking nung jenjang 9buba nung aliba India nunger asayar ya India nunger

tebur asayatem rongnungi World Championships nung medal anguba asayar pongububa kumogo.

Hokolbarnü pai quarterfinals nung world number 1 asayar Viktor Axelsen tsükdaktsü, ajisiüaka Kerala nungi arishi kum 31 tain asayar yagi third seed asayar Kunlavut mekokteti liasü.

Mezüngbuba asaya kokaka India nunger asayar ya belematok aser pai tanungba set ana mekokteti asaya mekoki liasü. Tena tsüngda minute 76 asaya liasü.

Prannoy-i takum kanga junga asaya arudar aser pai Malaysia Masters Super 500-

a kokogo aser tang iba tetushi asayamung nung bronze medal ngutetogo. Paisa, Australian Open Super 500 final tonga asayatetogo. Pai kanga junga asayaba sülen BWF rankings nunga pa jenjang 9bubai tuogo.

Quarterfinal nung Prannoy-i defending champion aser top-seeded aser world number 1 asayar Viktor Axelsen koka liasü.

World Championship 2023 mezüngbuba round nung Prannoy-i, Finland nunger asayar Kolle Koljonen 24-22, 21-10 agi akok aser tanabuba round nung Chico Aura Dwi Wardoyo 21-9, 21-14 agi koka liasü. Loh Kean Yew den asayaba mapang Kerala nungi asayar yagi set asempuba nungang 21-18, 15-21, 21-19 agi takok ngua quarterfinal-i ia liasü.

Prannoy ya India nunger asayatem rongnungi World Championships kija asaya nung medal anguba asayar 14buba kumogo. Iba asayamung nung PV Sindhu (5), Saina Nehwal (2), Kidambi Srikanth (1), Lakshya Sen (1), B Sai Praneeth (1) aser Prakash Padukone (1) nungeria medal ngua lir.

10th NEZSC 2023 nung Nagaland nungi medal 9 angu



Dimapur, Luroi/August 27 (TYO): Shooting Association of Meghalaya (SAM) ajanga Assam Regimental Centre, Shillong, Meghalaya nung 10th North East Zone Shooting Championship 2023 sentong August 20-27, 2023 anogotem agia liasü.

Iba tetoktepba nung Assam, Arunachal Pradesh, Meghalaya, Manipur, Mizoram aser Nagaland nungi shooter 227 tashi dena Assam ya overall champions liasü.

Iba Championship nung Nagaland nungi nisung 17-i shilem agia jenjang balala nung takok yamai ngua liasü:

1. 10M Air Rifle Sub Youth Women Individual - Ms. Yimyakumla - Silver
2. 10M Air Rifle Youth Women Individual - Ms. Yimyakumla - Bronze
3. 10M Air Rifle Junior Women Individual - Ms. Yimyakumla - Bronze
4. 10M Air Pistol Sub Youth Men Individual - Immanungsang Tzudir - Silver
5. 10M Air Pistol Youth Men Individual - Immanungsang

6. 10M Air Pistol Men Individual - Neizo Belho - Silver
7. 10M Air Pistol Master Men Individual - Lanu Rongsenkaba Jamir - Silver
8. 25M Standard Pistol Master Men Individual - Lanu Rongsenkaba Jamir - Silver
9. 50M Rifle P.S Prone Master Men Individual - Lanu Akumtoshi Jamir - Bronze.

November/December 2023 mapang 66th National Shooting Championship Competitions (NSCC) 2023 nung shilem agitsü asoshi Nagaland nungi shooter tenet qualify süogo.

Maneni 11th North East Zone Shooting Championship (NEZSC) 2024 ya Nagaland nung alitsü sangdongogo, koba Aries Rifle and Pistol Shooting Academy, Khelo India Centre, Dimapur ajanga ayongzüksü aser National Rifle Association of India (NRAI) kübok Nagaland Rifle Association ajanga agitsü, ta Nagaland Rifle Association tir Merang Jamir-i sangdong ka ajanga ashi.

Asia Cup atema Afghanistan team nung Janat züngoksemogo

Kabul, Luroi/August 27 (Agencies): Asia Cup atema Afghanistan team Deobarnü sangdong nung züngoksema aliba sülen bowling all-rounder Karim Janat, kum trok sülen maneni linük team nungi asayatsü atema maongka nguogo.

Arishi kum 25 tain asayar ya 2017 kum Zimbabwe den ODI asayaba mapang khen asayar liasü aser pa Test asaya nung takum Bangladesh den asayaba mapang

mezüngbuba asayaogo. Kasa mapang nung ano all-rounder Sharafuddin Ashraf-a asayar 17 agi kumtetba team nung züngoksema lir.

Pakistan 3-0 agi makokba asayamung nung züngoksema aliba asayar Wafadar Momand aser Azmatullah Omarzai na Asia Cup atema team nung züngoksema mali.

Hashmatullah Shahidi-i aniba Afghanistan team ya Asia Cup nung mezüngbuba asaya Lahore nung

September 3 nu Bangladesh den asayatsü.

Afghanistan team nung asayatem yamai alitsü:

Rahmanullah Gurbaz, Ibrahim Zadran, Riaz Hassan, Rahmat Shah, Hashmatullah Shahidi (captain), Najibullah Zadran, Mohammad Nabi, Ikram Alikhil, Rashid Khan, Gulbadin Naib, Karim Janat, Abdul Rahman, Sharafuddin Ashraf, Mujeeb Ur Rahman, Noor Ahmad, Mohammad Saleem, Fazalhaq Farooqi.



Badminton World Championship 2023, tetsür tarep asaya akokba china team den tanabuba Indonesia team aser tasempuba Korea team nungi asayatem tangokba noksa nung angur.

Bianca Andreescu yiruba ajanga US Open nung masayatetsü

New Delhi, Luroi/August 27 (Agencies): US Open ayongertemi sangdong ka ajanga ashiba agi, taoba mapang iba asayamung koker aliba asayar Bianca Andreescu yiruba ajanga takum iba asayamung nung shilem magitetsü.

Canada tsür la ya teberem nung timtem aliba ajanga kangshia arudar.

Andreescu-i 2019 kum US Open koka liasü, ajisiüaka tawa junga masayateti arudar. La taoba ita Washington DC nung Citi Open asayaba mapang asayamung tetenzüklen tsükatok aser iba sülen Canadian Open nunga Camila Giorgi-i straight set nung koka liasü.

Italy tsür Giorgi den asayaba

mapang la temang nung timtem aliba rebrangetetogo aser temang anepalutsü atema court-i physiotherapist ka jaoka liasü.

Iba sülen Andreescu, Cincinnati Masters nung masayatsü atema telemtetba agi aser ashiba agi, "Washington nung asayaba mapang teberem nung tashiba ka liasü aser tashiba ya tamajungba küma ao aser Montreal nung ni takokba tashi temaba jenjang nung asayatsü merangdanga liasü."

"Iba sülen ni temang asadangtsüsa akum aser tia maka teberem nung timtem aliba ngutetogo," ta lai ashi.

Arishi kum 23 tain Andreescu ya US Open mezüngbuba round nung Ukraine tsür Lesia Tsurenko den asayatsü liasü.

BIEMDANGANG
"Angazüksü atema akmesena teli."